

冠軍 〈移居〉

—— 董秀生

寒銷天水碧，卜宅且南移。
低樹流芳暗，高窗碎影遲。
鄰聲侵曉夢，紗幔漾春曦。
偶得清心客，茶香夜雨時。

亞軍 〈日本海嘯核洩漏有感〉

—— 葉燭光

一浪冤魂弔萬千，深悲輻射禍綿延。
曾矜核電能強國，更駕仙槎要霸天。
碌碌生涯如過客，茫茫星際計光年。
誰將宇宙無窮大，可把人心慾壑填。

季軍 〈辛卯感舊〉

—— 焦磊

聚散匆匆事數遷，紛紜碎影換流年。
曾因翠袖醱釀酒，便許青溪舴艋船。
洛浦當時存賦筆，梁園何處問吟箋。
只今粵海蕭疏雨，似訴心期盡惘然。

優異獎 〈哀塵寰〉

—— 李卓恒

四時今也竟無全，節序循環苦問天。
隱隱春雷冬月再，炎炎秋熱暑雲連。
層冰漸解寒流退，大氣中開日照穿。
應是人為成禍劫，化工誇奪最堪憐。

優異獎 〈海釣〉

—— 黃以芍

伶仃波浪渺無邊，有客飄然放釣船。
海霧濃時迷遠近，洞巖聳處接雲天。
不驚風雨侵筠笠，敢扯魚龍上艇舷。
日落長空人散去，回頭荒島沒蒼煙。

優異獎 〈一年〉

—— 鄔式窩

去國經憂患，支愁又一年。
病顏深著酒，倦眼理殘篇。
鳥語柴門外，舟行綠水前。
庭階梅已綻，猶喜佔春先。

優異獎 〈答客〉

—— 潘少孟

論交得失寸心知，日月飛輪世轉移。
衣食風塵忙裡過，文章志業老仍期。
讀書尚古觀人鏡，解惑同行有我師。
又是黃昏聞木鐸，群經諸子足神馳。

優異獎 〈崖門古戰場憑弔〉

—— 鍾一暉

豐碑殘壘大江邊，認記前朝烽火燃。
濁浪怒騰胡虜血，腥風蹂躪宋王船。
挽天空有興亡恨，殉國長存忠烈篇。
正氣不隨東逝水，崖山屹屹也淒然。

特別獎 〈觀洛神有感〉

—— 李藝明

妙韻縈樑襯管弦，春風銅雀樂喧天。
枉留嚙臂盟心印，痛鑄燃萁煮豆篇。
太息明珠沈水殿，永懷舊侶弔寒川。
凌波舞罷驚鴻渺，未散歌臺幾縷煙。

特別獎 〈竹〉

—— 施教農

久蓄凌雲志，聞雷擢勁枝。
虛心高不傲，抱節貴難移。
叱咤隨龍嘯，檀欒引鳳窺。
松梅三勝友，雪裡競貞姿。

第二十一屆全港詩詞創作比賽

【律詩】

獲獎作品

公共圖書館自一九九一年起舉辦「全港詩詞創作比賽」，單年比詩，雙年比詞，旨在提高市民之中國語文運用及韻文欣賞的能力。今年舉辦的「第二十一屆全港詩詞創作比賽」，已是第十一度的「律詩比賽」。評審委員有何文匯教授、周錫韜教授、陳志清教授、黃坤堯教授及劉衛林教授。

比賽分學生組及公開組，題材由作者自定，五言或七言律詩不拘，用韻則限用「四支」及「一先」二韻。今屆的參賽者非常踴躍，共收到九百多份參賽作品。學生組參賽者來自各大專院校及高中學生；公開組參賽者則來自社會不同階層。是屆參賽者的作品水準甚高，評審委員經初選、複選，反覆討論，才能決定名次。為確保評選公正，整個評審過程採用匿名方式進行。評判團更約見了學生組入選參賽者，並要求入選者即席對聯，才定出優勝作品。

學生組

冠軍 〈旅外登臨自遣〉

—— 陳榮生 • 香港中文大學

舉盞徒添遠客悲，危樓晚照悵歸期。
爭先疊浪趨新渚，競秀層林壓嫩枝。
王粲難眠知夜永，稼軒初癒覺筋疲。
今朝負氣千秋醉，莫為榮枯不展眉。

亞軍 〈樓價高企有感〉

—— 黃啟深 • 伊利沙伯中學

櫛比岑樓欲到天，可憐卜築夢顛連。
黎民思庇嗟高價，富賈居奇擁萬錢。
終古誰傳端木道，於今無復孝皇年。
少陵寒夜悲茅舍，恐自魂歸更惘然。

季軍 〈讀史記〉

—— 嚴偉 • 香港中文大學

大詬而為豈辱先，名山發玉百三篇。
一家言繼春秋義，萬世型垂紀傳編。
帝夏蒼麟變今古，夷齊西楚際人天。
離騷韻絕傾卮爵，每恨書生膏自煎。

優異獎 〈登屯門青山紅樓〉

—— 崔宇麒 • 香港中文大學

長懷辛亥當年事，重遇青山更可悲。
白日旗飄蝴蝶岸，紅樓夢沒薜蘿枝。
籬飛彩帶滄桑外，月照殘碑涕淚垂。
百載黃花餘感慨，登臨空憶偉人時。

優異獎 〈登凌霄閣〉

—— 張靜文 • 香港中文大學

勾角破巒迴絕壁，龍階騰踏接蒼天。
風平維港千舟競，夕照獅山萬戶邊。
臺作杯盤霞作酒，燈為友伴雨為絃。
但求枕月凌霄裡，不管人間此幾年。

優異獎 〈臨白泥碉堡寄懷〉

—— 黃湛 • 嶺南大學

獨酌殘臺江海偏，前朝若夢柳如煙。
千杯苦樂浮雲外，萬古榮枯逝水邊。
白鳥花香皆自在，蒼山月色兩陶然。
清風一夜懸霜冷，不肯偷閒學少年。

優異獎 〈寶馬山早春〉

—— 鄭智文 • 香港樹仁大學

二月春來細雨遲，煙楊未綠暗垂絲。
山林草冷花香薄，石徑人稀日影移。
歇路連綿宿重霧，長天寥廓發空枝。
只今未見繁華景，終有桃紅盛放時。

優異獎 〈哀日本大地震〉

—— 羅偉深 • 香港中文大學

憑欄東望絕雲煙，怒海洶洶欲問天。
滿縣樓坍幾代恨，無情水沒萬家田。
核殃險急流民恐，野哭淒涼舉世憐。
空憶昔時邦國秀，不知造物更茫然。

特別獎 〈登城寨公園邀山樓〉

—— 孔靜盈 • 香港中文大學

遨遊城寨尋幽勝，路盡邀山立眼前。
疊石漪淪濺崖岸，曲廊竹徑倚雲天。
遙看峻嶺獅峰遠，俯視芳園樂苑連。
百載問誰懷往事，今朝杯酒對殘煙。

特別獎 〈論秦始皇〉

—— 蕭嘉文 • 香港中文大學

烽煙不絕七國亂，地險兵威秦似獅。
猛吼始皇詔天下，同書小篆合華夷。
血流坑墓埋儒怨，淚盡長城哭女悲。
青史留名述褒貶，仁心搖落運終衰。